

# Id ash d Paul O'ohana am ha Wui g Ephesus t am Wohochuddam

---

**1** Ni-wepnag mam am kih  
Ephesus t am:

Am ant wo i em-o'ohani g Jiosh  
ha'ichu ahga ahni Paul. Jiosh at  
am i ni-kei mant wo i ahgahi ab  
amjed g alidaj Jesus Christ. Kuni  
kah mamsh ab s-wohochud g Jesus  
ch s-ap himchud g e-doakag heg  
wehhejed.

<sup>2</sup>Ab o wa si s-em-ho'ige'id g Jiosh  
t-ohg g t-kownalig Jesus Christ  
wehm ch ab wo wa ba'ich i em-  
mahkad g i wehmtadag ch s-ap  
tahhadkam.

## Mo has masma ab s-t- ho'ige'id g Jiosh

<sup>3</sup>Jiosh o ab wehs t-makiog  
g e-ho'ige'idadag nach pi ab  
s-wohochud g alidaj. Kutt heg hekaj  
ab wo si ho'ige'idad. <sup>4</sup>Pi at wa koi  
ha'ichu sha'i nahto g Jiosh k hab i  
e ah mat ab wo i t-gawulkai matt  
d wo hekia s-ap'ekamk am tahgio  
ch pi wo ha chu'ijigk. Si o pihk e  
elid t-hekaj <sup>5</sup>ch am i ap'ech mat g  
alidaj am hab wo t-juh matt hab  
wa'ap d wo a'aligajk. <sup>6</sup>Heg att hekaj  
ab wo si hehgchulidad g Jiosh. Si  
o s-ap ab t-neid nach pi d hemako  
g si tatchuidch alidaj wehm. <sup>7</sup>Heg

eh'ed at am e iawua kots t ab. Kut  
ab nako g s-ko'ok t-namkidadag  
mat gam hu hab wo i juh g pi ap  
t-chu'ijig k wo t-do'ibia. Si o ge'ej g  
Jiosh hemajimalig ab t-wui. <sup>8</sup>Ab  
o t-mahkch g ha'ichu mahchig ch  
ha'ichu amichudadag.

<sup>9</sup>Pi o ta machima g Jiosh hab  
elida. T wabshaba heki hu am  
i ap'ech mat ia'i idani haha wo  
t-mahtchul. <sup>10</sup>K id hab d elidaj  
matsh g Christ d wo kownalk wehs  
ha'ichu dahm. Am at i ap'ech g  
tash matsh wehs ha'ichu ab wo i  
hemakoj Christ wecho. Wehs hegai  
mo an dahm kahchim ch ed ch  
hegai mo in jewed dahm at ab wo  
wechokad.

<sup>11</sup>Wehs at hab wo e juh g Jiosh  
hab elida. K hab d elidaj ged hu i  
shohshon k amjed mat wehpeg ab  
wo i t-gawulkai ahchim Tutuligo.  
<sup>12</sup>K ab t-ab matt ab wo si has elidad  
g Jiosh ahchim matt wehpeg ab i  
s-wohoch g ha'ichu ahgaj ab amjed  
g alidaj.

<sup>13</sup>Kumt ahpim gawul mahs  
hemajkam hab wa'ap kah k ab i  
s-wohoch ihda s-kehg ha'ichu ahgaj.  
Kut heg hekaj hab wa'ap em-do'ibia  
g Jiosh k hab wa'ap ab em-mah

g Hekia S-ap'ekam Gewkdag mash hab masma heki hu hab kajj matsh hab wo em-juni. Ihda Hekia S-ap'ekam Gewkdag o am em-chehgidch mam hab wa'ap d Jiosh hemajkamga hab sha masma mo g em-cheposig am chehgidch g em-eniga. <sup>14</sup>Jiosh o ab t-mahkch g Hekia S-ap'ekam Gewkdag ahchim mach d hemajkamgaj. Kuch heg hekaj s-mahch matt wehs ab wo bei hegai mo haschu ab i t-makiog. S-ap at wo t-do'ibia ab wehs amjed g pi t-ap'edag. Kuch heg hekaj ab si has elid.

#### Id o d Paul ho'ige'idahuna ha wehhejed

<sup>15</sup>Ab amtsh i s-wohoch mo g Jesus d em-kownalig k si pihk e elid wehs ha hekaj g e-wehm wohochuddam. <sup>16</sup>Kuni heg hekaj chum hekid ab ho'ige'id g Jiosh. <sup>17</sup>Jiosh o d si ge'e s-ap'ekam ch d ohgaj g t-kownalig Jesus Christ. Kuni ab tahni mat ab wo em-mahkchid g amichudadag ch am ba'ich wo i e tashogidad em-wui. Mt hab ba'ich wo i s-ap s-mahchk g Jiosh. <sup>18</sup>Ab ani tahni mat wo em-tashogi mamt has wo masmak am ep i e chehegitok ch haschu wo edgidad mam d ab waidaj ch ab gawulkdas wehhejed. <sup>19</sup>Mt ep wo s-mahchk mat wehs wo hekaj g e-gewkdag am t-wehhejed ahchim mach ab s-wohochud. K g gewkdaj si ge'ej. <sup>20</sup>Am at wa chehgi g e-gewkdag id hekaj matki ab i wuhshad g e-alidag muhkig amjed k ab dai s-apkojed e-hugid ab an dahm kahchim ch ed <sup>21-22</sup>mat d wo kownalk wehs ha'ichu dahm. Dahm kahchim ch ed kokownal ch jewed

dahm kokownal o wehsijj ab wecho g Jiosh alidag.

K d ihda ge'e kownal mo g Jiosh ab t-mahkch mat d wo t-mo'o am himdamk ahchim mach ab s-wohochud. <sup>23</sup>Ch ahchim d hemajkamgaj ch wehmaj d hemako hab sha masma mach d honshpadaj. K heg d t-mo'o. Kuch am t-wehm d hekiakam. K eda heg an wehsko ha'ichug ch wehs ha'ichu an u'ukch ch wehs ha'ichu himchud am t-wehhejed.

#### Matt has masma wo bei g wechij doakag

**2** Heki am hu pi edgid ihda wechij doakag nam pi d pi ap chu'ijkam ch pi ab hu kaiham g Jiosh. <sup>2</sup>Jijawul ha-ge'ejig o an em-u'ukch hab masma mo an wehs ha u'ukch hegam mo pi ab hu kaiham g Jiosh. Kum hegam ha oidch am hab e junihim ch ab s-wohog elid g ge Jiawul.

<sup>3</sup>Wehsijj ach hab wa masmakahim ch am hab junihim g hejel pi ap hab t-elida. K wa ab t-wui him g s-ko'ok t-namkidadag. <sup>4-5</sup>Pi ach wa ab hu wohog elid g Jiosh ch gam hu gawulkdas ab amjed heg hekaj pi ap t-chu'ijig. K wabshaba g Jiosh t-hekaj si pihk e elid ch si s-hemajim t-do'ibia ab amjed g t-chu'ijig k ab t-mah g wechij doakag. Id o heg wa wepo mat heki hu ab i t-wuwhas muhkig t amjed <sup>6</sup>k am uhgk i t-u'u k an e-hugid an t-toa hab masma matsh hab juh g si e-alidag. Kuch hemu in melchud g Jesus kownaltalig jewed dahm hab masma mattsh an hahawa hab wo junihid dahm kahchim ch ed.

<sup>7</sup>Id at wehs am hab t-juni g Jiosh gahi wuhshanim g e-alidag. K hab d elidaj mat hab masma wehs am wo ha chehgi imhab i amjed mo has masma si s-hemajima ch ab si t-tatchua. <sup>8</sup>Ab at i s-t-ho'ige'el g Jiosh k do'ibia natt pi ab i s-wohoch. Pi att wo sha'i t-nako machs hejel wo t-do'ibia. Chum hems g t-wohochudadag o d mahkigdaj. <sup>9</sup>Pi o am hu ha'ichug machs haschukaj wo chum si t-gimaihunad no pi pi hejel hab d t-juni machs hekaj t-do'ibia. <sup>10</sup>Ab at i t-mah g Jiosh ihda wechij doakag. Kuki hab d elidaj matt hekaj am hab wo junihid hegai s-ap chikpan mat heki hu am i ap'lech am t-wehhejed.

**Nahnko mahs hemajkam  
o ab e hemakochudch ab  
s-wohochudch g Jesus**

<sup>11</sup>Am g wo s-chegitok ahpim gawul mahs hemajkam mam has i masma mamt eda koi ab hu i s-wohoch g Christ. Pi am wa pahl hikuchkas hab masma mach ahchim Tutuligo. <sup>12</sup>K g Jiosh pi ab hu em-mahkch hegai mo haschu ab t-mahkch ch pi ab hu em-mahtchulid mat ia wo i wuhshad g e-alidag mat d wo si Kehshajk. Kum wa pi ab hu wui i e gewpkad g Jiosh <sup>13-16</sup>ch pi mahch ch pi edgid g chehanigaj. Kuch wa heg hekaj s-em-keh'id. M ahpim ab aigo hab wa'ap s-t-keh'id. K hegai t-keh'idadag hab sha masma mo g kolhai ch gam hu a'ai t-ga'agwulkadch. T wabshaba g Christ s-ap am oidk hab e juh ihda chehanig k ab e muhkid kots t ab t-wehhejed k hab masma hugio g

gewkdaj g chehanig. K heg pi ab hu hahawa t-chu'ijigchud ahchim mach ab s-wohochud g Jiosh. Jesus Christ at ab i t-hemakoj e wehm. Kuch pi hahawa a'ai s-t-keh'id nach pi d hahawa hemako.

<sup>17</sup>Pegih, ia at wa jiwia g Jiosh alidag jewed dahm k am ahgachug t-shahgid ihda do'ibiadag ahga matt am hahawa em-wui u'apa ahpim gawul mahs hemajkam mam wa pi sha'i mahch g Jiosh. <sup>18</sup>K g Jiosh hab wa'ap ab em-mahkch g ap'edag ahpim mamt hab wa'ap ab i s-wohochud k ab wui i e dagito. K hab wa'ap an em-u'ukch g Hekia S-ap'ekam Gewkdag.

<sup>19</sup>Pi am d haha wabsh mehkjed o'odham ch wabshaba d a'aligaj g Jiosh. K g Jiosh ab em-mahkch g ap'edag am e-kihdag ed hab masma mo ahchim ab t-mahkch. <sup>20</sup>Id o heg wa wepo mam d Jiosh kihta. Kuch heg wa wepo mach d kih shon ahchim mach ha'i d Jesus si chuhchai ch ha'i d Jiosh ha'ichu i tashogiddam. K g Jesus an wehsijj t-u'ukch hab masma mach an ab kihtas. <sup>21</sup>Am o wabsh kia ge'edahim ihda kih no pi g Jiosh i ha ba'ihamahim hegam mo ab hahawa s-wohochud. <sup>22</sup>Kuch wehsijj t-wehm si s-ap hab chu'ig ch d s-ap'ekam cheopi no pi g Hekia S-ap'ekam Gewkdag am t-eda.

**Mo has mahs chikpan hab  
wua g Paul ha wehhejed g  
gawul mahs hemajkam**

**3** Ia am ni-kuhpch nani pi ahgachug g Jiosh ha'ichu ahga am ha shahgid g nahnko mahs hemajkam. Kuni am

ni-ho'ige'idahun Jiosh wui em-wehhejed nam pi d ni-wehm wohochuddam. <sup>2</sup>Am amtp hu wa'i kah mo ab ni-wui si s-hemajima g Jiosh ch ab ni-mah ihda chikpan mant hekaj wo i em-wehmajk. <sup>3</sup>Am at i ni-chehgi g s-a'agi e-apchuda mant ia he'es hekaj em-o'ohani. <sup>4</sup>Kumt wo s-mai am ne'okchulidch ihda mant am em-o'ohani mani has masma s-amichud ihda s-a'agi ha'ichu ab amjed g Christ. <sup>5</sup>Id o heki hu pi mahch g hemajkam. T wabshaba g Hekia S-ap'ekam Gewkdag hemuch am hahawa i t-tashogi ahchim Jesus Christ chuhchai ch Jiosh ha'ichu i tashogiddam. <sup>6</sup>Ihda s-a'agi ha'ichu ahga o hab chu'ig mam ahpim gawul mahs hemajkam ab hahawa t-wehm ap'edag ahchim Tutuligo id eda Jiosh ho'ige'idalg. Jiosh o ab t-mahkch g e-ap'edag nach pi ab s-wohochud g ha'ichu ahgaj ch ab hiwig g Jesus Christ.

<sup>7</sup>Kuni ahni d em-pionag ch am em-ahgid ihda s-kehg ha'ichu ahgaj g Jiosh. Heg at si s-ni-ho'ige'id k am i ni-kehsh k ab ni-mah g gewkdag mant wo em-ahgi. <sup>8</sup>Shahag wepo mani ahni wehs ha ba'ich d wabsh pi ha'ichu am ha shahgid g Jiosh hemajkamga. T eda g Jiosh ab ni-mah ihda ap'edag mant am wo em-ahgi ahpim nahnko mahs hemajkam g s-kehg ha'ichu ahgaj ab amjed g Christ ho'ige'idalg. Heg o ba'ich i si s-kehg s-ap hab chu'ig mo hig chumpk g si ge'e kaisdag. Kutt pi wo t-nako matt wehs wo s-amich. <sup>9</sup>Id o d ni-chikpan mant am wo i ha tashogi g hemajkam mo has masma hab chu'ig ihda s-a'agi

ha'ichu apchudaj g Jiosh. Jiosh at wehs ha'ichu nahto k wabshaba pi mahsko wua ihda s-kehg hab e-elida mu'i a'ahidag oidam <sup>10</sup>nat pi ia'i idani wo ha chehgi g anghil kokownal g mu'i nahnko mahs ha'ichu e-amichudadag am gai t-wuhshanim ahchim mat t-do'ibia. <sup>11</sup>Jiosh at am hab juh ihda gahi wuhshanim g t-kownalig Jesus Christ mat has i masma ap'ech ga hu i wehpeg. <sup>12</sup>Kuch ap'edag matt si s-gegokim ab wo i miabi g Jiosh ab s-wohochudch g ha'ichu ahgaj ab amjed g alidaj.

<sup>13</sup>Ab ani shoak em-wui mamt am wabsh wo si i e gewpkad k pi has wo e tahtkkad mani ni-sho'igchud em-wehhejed. Wehs o d wabsh em-ap'edag ihda ni-sho'igdag.

#### Mo g Christ ab si t-tatchua

<sup>14</sup>Id ani wehs am i chechegitod ch hekaj ab i gegshshe heg wui mat wehs ha'ichu nahto. <sup>15</sup>Wehs nahnko dakam hemajkam ch anghil o d nahtoj. T heg ab ha mah g ha-chechig. <sup>16</sup>Wehs o edgid g gewkdag g Jiosh ch ge'e ab t-makio. Kuni ab tahni mat ba'ich ab wo i em-mah. Hekia S-ap'ekam Gewkdag o am t-eda ha'ichug ch ab t-makio g Jiosh gewkdag. <sup>17</sup>Id o heg wa wepo mo g Christ am t-eda kih. Ab ani tahni g Jiosh mamt chum hekid hab wo masmak mo g Christ ch wo si pihk e elidag ab wehs ha wui. <sup>18-19</sup>Sho'o wa'i si ge'ej g Christ tatchuidag ab t-wui. Pi at hedai wo e nako mat wabsh hejel wo s-mai mo he'es i ge'ej. Kuni ab tahni g Jiosh mat am wo tashogidad em-wui mamt wo s-ap

s-mahchk. T hab wo i em-shuhdad g Jiosh gewkdag.

<sup>20</sup>Jiosh at wo e nako mat ba'ich i ge'e ha'ichu hab wo t-juni mach hems he'es ab i chum tahni o hems he'es i chegitod. Heg o hekaj hab t-junid e-gewkdag mo am chikpan t-eda. <sup>21</sup>Kutt chum hekid ab wo hehgchulidad ahchim mach d hemako g t-kownalig Jesus Christ wehm.

**Mach d hemako ab i  
t-hemakochudk g Christ wehm**

**4** Dani lihso heg hekaj mani ahgachug g ha'ichu ahga ab amjed g t-kownalig Jesus. Kuni ab si s-em-ho'ige'idam am em-ahgid mamt hab wo masmak mo has masma g Jiosh em-tatchuid ch ab i em-gawulkai. <sup>2</sup>Pi g am wo chum si e ha'ichuchudad ch wabshaba wo s-hehemajimak ch chum hekid ab wo s-e bahbgik ch ab a'ai wo e tatchuad. Am g wo e chehgidad mam ab a'ai e tatchua. <sup>3</sup>Ab at i t-hemakoch g Hekia S-ap'ekam Gewkdag. Pegih, mt wo si s-ap e tahtkkad ab a'ai e wui mamt pi gam hu a'ai wo i e ga'agwulkai. <sup>4</sup>Heg o wa wepo mach d honshpadaj g Christ nach pi d hemako ab wecho. Dach hemako no pi g Hekia S-ap'ekam Gewkdag d wa'i hemako ch am wehsijj t-eda. Kuch d hemako nach pi am t-wepo t-gewpkadch heg wui mo g Jiosh am t-wehhejed ap'echudch dahm kahchim ch ed. <sup>5</sup>Wehsijj ach d hemako nach pi ab wecho g hemako kownal ch t-wepo ha'ichu ab s-wohochud ch t-wepo t-pahl wapko. <sup>6</sup>Dach hemako no pi g Jiosh

d wa'i hemako ch wehsijj d t-ohg ch wehs t-dahm d kownal ch an wehsko hab chu'ig ch am ep wehsijj t-eda ha'ichug.

<sup>7</sup>Christ at wehsijj ab i t-mahkhi hegai matt hekaj ab a'ai wo i t-wehmajk. <sup>8</sup>Bo chu'ig g Jiosh heki hu o'ohana:

T wo ha gewito g e-obga k am wo hih dahm kahchim wui k ab amjed wo i ha mahkhi g e-hemajkamga g nahnko mahs mahchig ch gewkdag.

*Psalm 68:18*

<sup>9</sup>Pegih, bo chu'ig mat g si Kehshaj gan hu uhpam ep wo hih dahm kahchim wui. K heg hekaj tasho mat ia wo jiwia jewed dahm.

<sup>10</sup>Hegai mat ia jiwia jewed dahm o d hegai mat am uhpam hih e-kihdag wui an dahm kahchim ch ed k ab uhpam bei g e-gewkdag k am hahawa wehsko ha'ichug e-nahtoi ed. <sup>11</sup>Ab at t-mah ahchim e-hemajkamga g nahnko ha'ichu mahchig ch gewkdag. Kuch heg hekaj hab wua g nahnko mahs chikpan wehhejed. Am at ha'i i t-chuhcha matt an wo i oiopo k wo ah g ha'ichu ahgaj k am ha'i i t-chuhcha matt d wo Jiosh ha'ichu i tashogiddamk ch ha'i matt ab wo i ha wanim Jiosh wui ch ha'i matt wo ha nuhkudad g t-wehm wohochuddam ch wo ha mashchamad g Jiosh ha'ichu ahga. <sup>12</sup>Ab o t-mahkch g Jiosh ihda nahnko mahs chikpan matt hekaj am wo i ha ap'ech g Jiosh hemajkamga matt wehsijj wo t-nahtokchid matt am hab wo junihid g Christ chikpan ch ab a'ai wo i t-gewkemhunad. <sup>13</sup>Kutt heg

hekaj ab wo i t-hemakoj k ab wo i ge'ege'ehogat t-wohochudadag ed k wehs wo s-mahchk g wohokam ab amjed g Jiosh alidag ch wehs wo wepo masmak.

<sup>14</sup>Pi att hab haha wo masmak mo g a'al machs in has a'ai gawul wo junihid g t-wohochudadag. T hab pi wo e nako hegam mo am nahnko masma e nakog mat wo t-iattogi. <sup>15</sup>Am att wo ahgad g wohokam ab pihk t-elidch ha wui ch am wo i ge'ege'ehogat matt hab wo masmak mo g Christ. Heg o wa wepo mo g Christ d t-mo'o. <sup>16</sup>Ch ahchim d honshpadaj mach ab wui t-dagitokch ch s-ap t-wehm chikpan hab masma mach nahnko mahs d chuhchu'idaj. Batt wa'i masma am wo i ge'ege'ehogat t-wohochudadag ed matt ab a'ai wo si t-tatchuad ch am wo i t-wehmajk.

**Tt wo himad hegai wechij doakag mo g Jesus ab t-mahkch**

<sup>17</sup>Pi g am hu ha oidk hab wo masmak hegam mo pi mahch g Jiosh. Id o d t-kownalig Jesus chehanig. Hegam mo pi mahch g Jiosh o wabsh pehegi ha'ichu chegito <sup>18</sup>ch pi ha'ichu a'amichud ch ep pi checkkaidag. Id o heg wa wepo mo am s-chuhugam k ed hihim. K g Jiosh heg hekaj pi ab hu ha mahkch g wechij doakag. <sup>19</sup>Pi o edgid g si edadag no pi am wabsh e dagitokch pi ap'ekam wui ch hab junihim g nahnko mahs si s-uam ha'ichu.

<sup>20-21</sup>Mtsh wabshaba ahpim ab kah g do'ibiadag ahga k am i s-mai g Christ. Am amsh em-mashcham g wohokam ab amjed. Mt amjed pi

hab wo chum masmak mo hegam mo pi mahch g Jiosh. <sup>22</sup>Im g hu hab wo i juhni g pi ap e-tatchui. Heg o wa em-iattogid ch em-padchud. <sup>23</sup>T wabshaba g Jiosh am hab wo em-juh mat g em-tatchui ch em-doakag d wo hekia s-ap'ekamk. <sup>24</sup>Jiosh o ab t-mahkch g wechij doakag. K ihda doakag wepo masma mo g Jiosh doakag ch am e chehgidch mo heg wa'i tatchua s-ap'ekam. Am g wo himad g e-wechij doakag ch am wabsh wo dagito g pi ap'ekam.

<sup>25</sup>Dach t-wehm wohochuddam ch heg wa wepo mach d Christ honshpadag. K pi hab chum mahs machs a'ai wo t-iattogidad o hedai i ehp. Am g hab wo kaijjid g wohokam.

<sup>26</sup>Hemho wa amt wo babgat ab pi ap'ekam wui k wabshaba pi heg hekaj hab wo juh g pi ap'ekam. S-hohtam g wo dagito g e-bagatalig. <sup>27</sup>T hab pi wo e nako g Jiawul mas am hab wo em-juh mamt hab wo juh g pi ap'ekam.

<sup>28</sup>T wo ha'asa ha'ichu ha ehs hegam matp hedai ha'ichu ha ehsid. Ab o hab wa'ap ha ab mat wo chikpanad ch heg amjed ab wo edgidat mat haschukaj am wo i ha wehmt g sho'igkam.

<sup>29</sup>Pi g am wo pi kehg neneokad ch wabshaba wo s-ap neneokad ch ab a'ai wo i e gewkemhunad. T g em-ne'oki hab masma d wo i ha wehmtadagk hegam mat hedai wo i em-kahkad.

<sup>30</sup>Pi g am wo pi ap tahtchud g Hekia S-ap'ekam Gewkdag. Do hegai mo am t-eda ulinig. Kuch heg hekaj s-mahch mat g Jiosh s-ap am

wo i t-wahpki e-kihdag ed. <sup>31</sup>Im g hu hab wo i juhni g keh'idadag ch pi amkadag ch bagatalig ch kawhaina ch has ahgadag. <sup>32</sup>Jiosh at im hu hab i juh g pi ap t-chu'ijig matt ab i s-wohoch g Christ. Kumt ahpim hab wa masma ab a'ai wo s-e ho'ige'idad ch im hu hab wabsh wo i juh matp hema i chum s-ko'okam has wo em-juh.

### Mach am hihim Jiosh tonlig ed

**5** Ab o si t-tatchua g Jiosh. Kutt am oidch hab wo t-junihid nach pi d a'aligaj. <sup>2</sup>Christ o am hab junihim g e-ohg Jiosh tatchui ch ab si t-tatchua ch am t-wehhejed e muhkid. Kutt ahchim hab wa'ap ab aigo wo si tatchuad ch ab a'ai wo si t-tatchuad.

<sup>3</sup>Dach Jiosh hemajkamga. K pi hab chum mahs machs wo ha wehm wo'iwua matp hedai pi d t-wehm kihkam o achs wo chegito g s-uam ha'ichu o achs wo s-behim matp haschu pi ab hu d t-wuikam. <sup>4-5</sup>S-mahch am mat pi am hu wo i ha wahpki g Jiosh hegam mo hab wa masma. Hegai mat wo s-behim mo haschu pi ab hu d wuikamaj o heg jioshchud. (4) K pi hab chum mahs machs s-bihtagim wo neneokad o achs pehegi wo neneokad. Ab g wo ho'ige'idad g Jiosh.

<sup>6</sup>Ha'i oki hab kaij mo am wa s-ap'e hegam mo hab masma hab e junihim. Kumt wabshaba pi ab hu wo kaiha g pehegi ha-ne'oki. Jiosh at hemho wa s-ko'okam wo ha namkid hegam mat pi ab hu wo s-wohog el. <sup>7</sup>An g hu wabsh wo ha neidad hegam hab mahs hemajkam

ch pi am hu ha oidch hab wo e junihid.

<sup>8</sup>Ahpim amsh hab wa'ap masma heki hu. Heg o wa wepo mam wa am s-chuhugam k ed hihimad ch am hahawa i wuwha tonlig ch ed namt pi hahawa s-mai g t-kownalig Jesus Christ. Pegih, mt am wo hihimad g e-doakag id eda s-ap'ekam tonlig <sup>9</sup>ch hab masma hab wo junihid g s-ap'ekam ch wo ahgad g wohokam. <sup>10</sup>T g t-kownalig Jesus wo s-hohho'idad hegai mam haschu hab wua. <sup>11-12</sup>Pi amt am hu wo ha wehmajk hegam mo hab junihim g pi ap'ekam. Dat wo s-ta edam ha'ichuk mamt chum hems heg ab wo neneokad mo haschu s-a'agi hab wua idam. Kumt wabshaba wo ha ahgi mo pi ap hab e junihim. <sup>13-14</sup>T haha wo s-e mahchk mo has chu'ig. Bo d ahga ihda che'idag mo hab chu'ig:

Bam wa'i masma mo g  
kohlshdam o g ko'i ahpim  
mam hedai pi mahch g Jiosh.  
Ab g wo i wuwhaki no pi  
g Christ ab em-makiog g  
tonlig ch wechij doakag.

*Isaiah 60:1; 26:19*

<sup>15</sup>Am g wo si s-e nen'oidk mamt has masma wo himchudad g e-doakdag ch pi hab wo masmak mam d wabsh pi ha'ichu a'amichuddam. <sup>16</sup>Ge'ej o g pi ap'ekam hemu. K wabshaba g Jiosh ab t-mahkch g ap'edag matt hab wo junihid g s-ap'ekam. Am g s-ap wo hekaj g e-ap'edag. <sup>17</sup>Jiosh o am em-wui tashogid g e-tatchui. Am g wo si i a'amichud k wo s-mai mo haschu wud.

<sup>18</sup>Pi g wo nawkkad namt pi heg hekaj wo padch g e-doakag

mamt pi wo e do'ibia. Am g wehs wo i e dagitokchid Hekia S-ap'ekam Gewkdag wui. T heg an wo em-u'ukchid ch ab wo em-mahkchid g si ge'e s-ap tahhadkam. <sup>19</sup>Kumt hab ab a'ai wo i e gewkemhunad ch ab wo ihm ad g Jiosh g heki hu mihshmda nen'eikaj ch wechij mihshmda nen'ei <sup>20</sup>ch chum hekid ab wo ho'ige'id ad g Jiosh t-ohg wehs ha'ichukaj am chehchegch g t-kownalig Jesus Christ.

**E wehm kihkam at s-ap e tahtkk ch wo e wehm kihk**

<sup>21</sup>Ab g a'ai wo i e dagito e wui mamtp woho ab si has elid g Christ.

<sup>22</sup>Ahpim u'uwi amt ab wo i e dagito e-kuhkun ha wui. Id o ab d em-wuikam nam pi d Christ wohochuddam. <sup>23</sup>Kun o gewkdag am dahm g e-hohnig hab masma mo g Christ gewkdag am t-dahm ahchim mach ab ihm ch ab si hiwig. Ahchim ach heg wa wepo mach d honshpadaj. K heg d t-do'ibiakam.

<sup>24</sup>Ab att wehs wo i chum t-dagitokch wui. Kumt ahpim u'uwi hab wa masma wehs ab wo i chum e dagitokch e-kuhkun ha wui.

<sup>25</sup>Ahpim chechoj amt hab masma ab wo si ha tatchuad g e-hohonig mo g Christ ab si t-tatchua. Heg o ha'as ge'e ab si t-tatchua mat am t-wehhejed e dagito mamt wo mua. <sup>26</sup>Bat wa e juh mat hekaj wo t-wapkon k gam hu hab wo i juh g pi ap t-chu'ijig ahchim mach ab s-wohochud ch ab hiwig. Kut hab wa masma ab i t-gawulkai <sup>27</sup>e wehhejed matt d wo hekia s-ap'ekam enigajk. <sup>28</sup>Kumt ahpim

chechoj ab wo si ha tatchuad g e-hohonig hab masma mam ab si hejel e tatchua no pi heg wa wepo mam d hemako e wehm. Hejel e hekaj o si pihk e elid matp hedai g e-hohnigkaj si pihk e elid no pi d wa'i hemako. <sup>29-30</sup>Pi o hekid hedai hejel s-e keh'id ch wabshaba am i e nakog mat wo e gegosidad ch wo e nuhkudad. Kuch ahchim wohochuddam heg wa wepo mach d honshpadaj g Christ nach pi wehmaj d hemako. K heg s-ap t-nuhkud. <sup>31</sup>Kumt ahpim chechoj hab wa masma hab wo ha juhkchid g e-hohonig no pi hab chu'ig g Jiosh o'ohana:

Cheoj at am wo dagito g e-ohg ch e-je'e k wo ha hohnt k d haha wo hemakok g e-hohnig wehm. *Genesis 2:24*

<sup>32</sup>Neh, bo chu'ig ihda si s-has ha'ichu wohokam ab amjed g hohnta. Kuni id amjed am i chum em-tashogid mach d hemako g Christ wehm. <sup>33</sup>K wabshaba hab wa'ap tasho mat g cheoj hemho wa ab wo si tatchuad g e-wehm kihkam hab masma mo ab si hejel e tatchua. T g uwi ab wo si has elidad g e-kun.

**A'al at ab wo s-ha wohog elidad g e-jehj**

**6** Ab o em-ab ahpim a'al mamt ab wo s-ha wohog elidad g e-jehj no pi id d Christ tatchui ch d s-ap'ekam em-wehhejed. <sup>2-3</sup>Bo chu'ig g Jiosh heki hu o'ohana:

Ab g wo si has ha elidad g e-ohg ch e-je'e.

T wehs wo s-ap'ek em-wehhejed. Kumt ge'eho d wo dodakamk am jewed dahm. *Exodus 20:12*



Id o d wehpeg chehanigaj g Jiosh mo ab wehnags g ha'ichu ahgaj mat ha'ichu hab wo juni hegai mat ab wo s-wohog elidad.

**Ha-jehj at am s-ap wo i ha mashchamad g e-a'aliga**

<sup>4</sup>Ahpim jehj amt pi wabsh wo si s-gewkam ha shohbidad g e-a'aliga mamt wabsh wo ha babgach. Do Jiosh tatchui mamt am wo i ha mashcha ab amjed g Christ hab masma mam ha gegosid k ab wo i ha shohbi pi ap'ekam amjed.

**Matsh g pion ab wo s-wohog elidad g e-ahmo**

<sup>5</sup>Ahpim nenehol amt ab wo s-wohog ha elidad g e-a'amo ch ab wo si has ha elidad ch ab si e-tatchui amjed hab wo junihid g e-chikpan hab masma mamtp hems g Christ hab masma wo chikpandad <sup>6</sup>ch d wo piongajk. Pi amt hab wabsh wo junihid mas heg hekaj wo em-neidad g em-ahmo ch wo s-em-hohho'idad ch wabshaba hab wo junihid wehs g e-ihbdagkaj, chum as hems pi am hu wo em-neidad. Id o em-tatchuidch g Jiosh. <sup>7</sup>Kumt s-ap e tahtk k am hab wo junihid g e-chikpan nam pi g Jiosh ep chikpanid ch pi heg wa'i o'odham. <sup>8</sup>Mt wo s-chegitok mat g Jiosh ab uhpam wo i nodagi g em-namkidadag mamt haschu i s-kehg chikpan hab wo juh, chum ams hems d wo nehok o pi d wo nehok.

<sup>9</sup>Ahpim mam d a'amo amt wo s-ap i ha nuhkudad g e-pionag ch pi wo ha ebkiodad. Am g wo s-chegitok mam e wehm ahmo an

dahm kahchim ch ed. Kut ihda ahmo wehs t-wepo masma wo t-lodai.

**Matt has masma wo cheggia g ge Jiawul**

<sup>10</sup>Hemako ha'ichu ant hab ep wo chei. Ab g wo i e gewpkadch Jesus t ab no pi heg ab em-mahkch g ge'e gewkdag. <sup>11</sup>Ab g wo i hekaj hegai mo haschu g Jiosh ab em-mahkch k hab wo e nako mamt ab wui wo gegokiwua g ge Jiawul s-a'agi cheggiadag. <sup>12</sup>Pi ach g hemajkam ha cheggia ch wabshaba hegam ha cheggia mo d si pi ap'ekam gewpkdag in t-dahm ch ha-kokownalig ch ha-haha'ichuga ch g jijawul. <sup>13</sup>Mt heg hekaj ab wo si i hekaj g Jiosh gewkdag mamt wo e nahtokch hemu ch wo e nako mamt ab wui wo gegokiwua g pi ap'ekam mat hekid ab wo i em-cheggia. Kut pi wo sha'i i em-shul.

<sup>14</sup>Neh, mt wo si e nahtokchid wehhejed ihda cheggiadag. An g wo u'ukchid g wohokam. T id heg wo wa wepok mo g cheggiakud giwud.

Am g hab wo wa'i junihid g s-ap'ekam. T id heg wo wa wepok mamt ab hab juh g wainomi lihwa.

<sup>15</sup>Mt wo e nahtokchid mamt wo i ahgahi ihda s-kehg ha'ichu ahga mo g Jiosh s-ha do'ibiamk. T id heg wo wa wepok mamt ab cheka g e-shuhshk.

<sup>16</sup>Jiawul o chum s-em-padchudamk hab sha masma mat wo ha mehi g hahpod k hekaj wo em-mummu. Mt wabshaba s-wihnam wo u'ukchid g e-wohochudadag hab wa masma

mamt g kawad am e tahgio wo ulinichid. T hab pi has wo em-juh.

<sup>17</sup>Ab g wo s-wohochud mat em-do'ibia g Jiosh k pi hekid wo em-dagito. T ihda em-do'ibiadag hab wo wa masmak mo g wainomi wonami.

An g wo u'ukchid g Jiosh ha'ichu ahga hab sha masma mamtp hems g is-pahyo. Id o ab em-mahkch g Hekia S-ap'ekam Gewkdag mamt hekaj wo gewito g Jiawul. <sup>18</sup>Kumt chum hekid wo e ho'ige'idahunad ch ab wo tahnid g Jiosh g i wehmtadag. Hekia S-ap'ekam Gewkdag o am i t-wehmaj t-ho'ige'idahuna ed. Kumt wo s-nenenashank ch wo e ho'ige'idahunad ha wehhejed g Jiosh hemajkamga.

<sup>19</sup>Ahni amt am hab wa'ap wo e ho'ige'idahunad ni-wehhejed mat g Jiosh ab wo ni-mah g ne'oki mat hekid wo i e ai mant am wo ha jehnigi. Nt hekaj

s-ni-mamachim ch s-gewkam am wo ah ihda s-kehg ha'ichu ahgaj g Jiosh mat ia'i idani hahawa t-tashogi. <sup>20</sup>Id ani hekaj d lihso mani id ahgachug. Kumt am wo si e ho'ige'idahunad mant s-gewkam wo ahgad mant has wo i chum masmak.

**Mo ab ha tahnid g ha-ho'ige'elig**

<sup>21-22</sup>Ab ani chehani g t-wehnag Tychicus mat am wo i em-chehgimed k am wo em-ahgi mani has wa'i masma ch has ni-wua. Do si s-ap piongaj g Christ ch si s-ap am wo i em-gewkemhu em-ahigdch mach has t-wua.

<sup>23</sup>Am ani ni-ho'ige'idahun mat g Jiosh t-ohg ch g t-kownalig Jesus Christ ab ba'ich wo i em-mah g s-ap tahhadkam ch pihk elidadag nam pi d wohochuddam. <sup>24</sup>Jiosh at ba'ich ep wo i s-em-ho'ige'el wehs ahpim mam woho ab si tatchua g t-kownalig Jesus Christ.